

四庫全書

集部

欽定四庫全書

集部
石隱園藏稿卷一

詳校官監察御史_臣曹錫寶

侍讀_臣孫球覆勘

覆校官編修_臣王汝嘉

校對官中書_臣吳俊

謄錄貢生_臣宋大樽

欽定四庫全書

集部六

石隱園藏稿目錄

別集類五
明

卷一

詩

卷二

文一

卷三

文二

卷四

文三

卷五

疏一

卷六

疏二

卷七

疏三

卷八

書

臣等謹案石隱園藏稿八卷明畢自嚴撰自
嚴字景曾淄川人萬厯壬辰進士官至戶部
尚書事蹟具明史本傳方自嚴總國計時外
則封疆已蹙而軍餉日增內則東林奄黨水
火紛拏閭閻然置社稷而爭門戶自嚴支拄其
間前後六年綜覈敏練為天下所推孫廷銓

為作墓誌稱其有石隱藏稿八卷奏議一百
三十六卷其奏議今未見獨此集存凡詩一
卷文七卷前有高珩序稱其官戶部時於天
下大計朗朗於胸屈指兵食欸目如觀掌果
軍興旁午中旨日數十下即刻奏成手中不
似後來者止署紙尾令司屬具藁每入署輿
後置書二寸餘日晡事竣盡讀所携書乃歸
又稱其七言近體分滄溟華泉之座雖鄉曲

之言未免稍溢而以經濟兼文章則自嚴要不愧也珩所稱雲間條議十則冀寧大閱十則災祲竄議十三則今皆不見集中意其在奏議一百三十六卷中歟乾隆四十二年五月恭校上

總纂官臣紀昀臣陸錫熊臣孫士毅

總校官臣陸費墀

石隱園藏稿原序

余邑自明嘉隆以來士大夫彬彬起多致身公若卿間
而以厚德名于時者余所睹記則大司農畢公白陽先
生蓋其冠冕云然余弱冠時則先生已致政里居余方
伏首博士弟子業天下大計茫然如墮雲霧中不能知
先生之功在曩常者何等也比余佐部嘗奏事入

朝與諸君子語廊廡間偶及計部之難其才大司馬坤
安張公曰君同邑白陽畢公真大司農也向余以子

部事公公精敏嫻熟天下大計朗朗于胷屈指兵食款目如觀掌果時軍興旁午中旨日數十下公即刻奏成手中一一當上旨不似後來者止署字紙尾令司屬具藁崇以子部為左右手也公每入署輿後置書二寸餘日晡事竣僚友倦劇皆呵殿出怡然大小三昧矣公方危坐火房一燈熒熒必讀盡所挾書漏下數刻餘乃歸以為常今安得再見其人乎余因歎服先生宦業如此是誠向者草茅所不能晰也然私念先生志在經邦鉛

槩之事或當不復與文士爭鳴矣久之余以定省歸偶
于友人家見先生七言近體數首金石之聲鏗然揖華
泉滄溟而分其座乃大驚異自念管中窺豹殆無能測
先生之高深而徧詢鄉中士大夫亦未有知先生素嫻
詩歌古文詞者因益歎服前輩之善晦其長如陽元縱
送為更不可及也迨稷山君發篋見貺巨麗之編煌然
富有乃得卒業焉作而三歎曰古人不朽之事有三先
生其庶幾乎夫樹德以立其本經方以達其用大人之

事備矣而摘詞虎僕復洋洋而登作者之壇澤于古者
如此其宏也匠于心者如此其慧也時方以鉤章棘句
樊徐認體為宗工公夷然不屑為而暢經術明德誼籌
時務曲折如意條達醇懿復多風則此即令刺藝績文
之士抱槩而寐挾策以呻矻矻窮年分其一臠尚詫照
乘而詡世人以所未有乃先生終童之年已分大府策
勲內外迄于頌白中間子墨客卿之交似無多日矣而
謀篇之富乃埒猗頌何邪豈非林下息機服膺一編蕭

然宛如素士而公餘退食仍與古人晤對如司馬所云
仕優不廢學者蓋隨地而皆然乎夫前代傳人如何李
諸君允樹藝林赤幟矣而經國大業未勒王朝即鼂賈
多石畫亦托不律垂之名山爾未見坐而言之起而行
之之有成勞則昔人所言此輩東之高閣算子不知顛
倒者其詬辱文士固有淺深而欲以間執其口則又夏
夏乎其難之也讀先生此集固為古人一洒之鄼侯劉
晏遂抽鼂賈之簞照耀文苑此實古來僅事矣而先生

闇然自晦留有餘以裕後人者復事事類此宜哉稷山君之嫻于詞而良于政發皇未艾知有以紹前烈而光大之無疑也獨惜余方少年時懵焉不知天下之大計亦不知名公巨卿雖海內之大亦不可以數邁遂至以桑梓密邇無能孜孜請益聞所未聞而逝者如斯年齒遽及方慨然有志詢往代之經猷攷先民之文獻而已不可復得故老日稀前蹟愈沒百年之間遂邈然如三代漢唐同矣此余讀遺文而追賞旁皇亦黯然慨息不

能自釋于中者也然先生篋衍中尚有編輯書種種皆
世人未見者俟稷山君政成報最盡錦歸里時當勤求
壁中藏書而盡讀之先生音微依稀如睹當亦不減耳
提爾同邑後學高珩撰

欽定四庫全書

石隱園藏稿卷一

明 畢自嚴 撰

詩

賦得薰風入菡萏

微風起青蘋吹入芙蓉畔
翠蓋相招搖紅粧爭歷亂
佇觀綽約姿忽訝天香薦
中有鸛鷺羣喁喁時隱見
高懷憶茂叔昕夕起留戀

夾竹桃

竹操一何堅青青冬不渝桃夭一何艷灼灼春華敷爾
且兼得之綠葩間紅跗三歧依彩檻五出曜琅玕竹兮
饒媚態桃兮耐歲寒迴風聊蕭瑟朱翠舞珊珊余本素
心人常作嘉卉想兀坐手一編長日恣欣賞夜月照前
除對爾更神爽

月季花

花開惟一度爾獨占四時幾番新雨後綠葉發華滋春

明伴桃李夏至映榴葵秋爭霜菊艷冬鬪雪梅姿高低
互隱見深淺總歲華節序暗中遞紅顏無老期燦燦奪
朝霞而堪薦玉卮聊植中庭畔悠然慰我思安得騷人
筆爛漫寫新辭

河東請告歸塗詠懷

行年四十六通籍念復三自揣無寸補濫竽至藩參馳
驅南北徧世味短長諳況兼愁病侵久已萬慮澹雙丸
不我待五斗安足淹盛名難副實造化忌取貪一朝仗

金匱要略卷一
卷一
慧劍抉破蜚抽簪從茲事南畝優游老巖岵積書富萬
卷俯仰恣幽探此身輕蟬翼苦去乃得甘止足遠殆辱
漢代有高談進退當自決任人笑予慙

題韓惺菴中丞久視樓

老氏育先天髮皓顏若童駕言西極遊紫炁滿關中緒
出五千言著名河上公猶龍仙馭遠誰復叩玄風畔援
汨天真優游伏鳩戎妍媸渾莫辨五色令人惜所以羨
長年而無久視翁中丞蚤聞道泥滓起冥鴻中外勲名

滿飄然晦厥躬辭榮賦考槃問道慕崆峒避俗營真境
樓居煥以崇社中同志侶杖履鎮相從奇態看皆幻心
柔氣亦融靈光葆太和返照見真空澹漠神愈王希夷
體自充機緣日以盡性命日以豐朝徹澄如水谷神壽
比嵩我來登此樓儼入清虛宮快聆長生秘欣承鍊性
功俯瞰名利客掠亂撲春蟲松栢與龜鶴會極數有終
獨茲久視訣歷劫將安窮

留計移疾獲請詠懷

觀光忝昔辛解組嫌今遲自嗟薑桂性兼之蒲柳姿七
尺猥承匱四牡幾載馳晚荷儲精寄尋緹紀綱司未幾
叨敷授奚以報鴻慈祿厚責彌重汲深綆莫支筋力空
殫竭膏肓悲暗滋匡弼況未效其如青史嗤坐是乞鑑
湖烟水聊自怡竊慶拜明綸從此免素尸貝丘宵夢繞
岱麓春雲垂華膺非所願衡泌可樂飢永矢南郭隱長
謝北山移

送康莊衢少司農擢南大司寇

知君莫如我送君難為別宜無陽關情未語喉先咽念
我髮云短持籌擔莫輟物力值寒儉欲舞肘已掣天幸
假我公墳荒如夙結夷險與同舟淺深共屬揭談笑亦
先憂念茲在涸轍肝膽照松筠金石鑄齒舌朝對巫山
雲暮見峨眉雪元氣渾浩溟風韻自爽潔法曜忽南移
帝簡在名餘舊都繁華地雅鎮惟素節誰謂湯網疎明
允可立折九府泉流清三章約法晰惟此有本人綱整
而目截天闕山最高秦淮水更列山水有知音聲價為

君設北指是斗杓衰然冠九列鈞衡豈相私霖雨待手
挈惟祝君此行得情慎勿悅

石隱園懷古

天地為蘧廬光陰成駒隙名譽等浮漚冠簪亦陳迹世
網空勞勞禮法殊役役所以賢達士雅有烟霞癖山簡
迷目花贊皇醒酒石李白桃李園謝眺青山宅締思古
人風堪作今人格余今凋朱顏何須戀赤烏抗疏謝軒
冕跣足踐蓬藿築屋治場圃賓雲友泉石賦性本清真

秉心矢皓白階前饒蔥蒨架上富墳籍黃鳥鳴林皋蠹
魚侵几席醴酒恣歡娛山蔬供烹炙焚香理素書懸榻
迎山客維石性最堅從不受磨折余隱誓效之腐鼠安
能嚇不羨公與侯何心仙與釋寧知春與秋併忘朝與
夕斯為石隱園吾以適吾適

追贊耿侍御年伯

大夫矯矯龍鵠姿才華氣節傾當時惠文柱後豪右避
埋輪都下豺狼悲一朝南巡持繡斧風凜霜冽和甘雨

明有法度幽鬼神寧能希指濫網罟浮雲蔽日天聽高
江干澤畔空牢騷仁人放麋誠不忍獨秉三尺障洪濤
論定司徒還上書賢奸皎皎列前除炙手氣燄有時盡
保全忠謹論非虛況看詰嗣紹前修慰藉虞淵援魯矛
嗇前豐後較孰勝且有竹帛光千秋

送蘇直指雲浦由三晉移節漢澤

有序

直指蘇公三楚人豪也其立朝大節所獻替摘發者
悉關安危消長之數未易更僕論其按晉也當繡斧

久懸後吏牘填委數十筭公剖決如流決旬立辨犁
然中肯歲大計糾彈貪墨長吏以上數十人肅然澄
清矣至行部慮囚刻意平反俾戴盆者共耀光明有
古下車泣罪風三晉嘖嘖誦神君不置乃無何有中
州觀察之推矣一時中外咸憤懣為不平而公歸思
甚濃澹乎有以自適也發為詩歌一夕數千言間出
相示忠厚瀟灑蓋公妙解禪理已臻大覺一切功名
富貴直浮雲視之泰宇定矣憶昔公為中翰嚴待罪

虞部邂逅於西朝漏舍片語傾蓋嗣是不通間問者
六七年乃復執鞭弭以事公晉陽初入晉嚴以冀寧
分藩循例迺境上既有事於大閱及文武聞晉奉命
走比按節河東則嚴又以公鴻北先量移蒲坂矣周
旋決歲宜非夙緣公推心置腹往往出堂廉形迹之
外茲自河東移節漢澤未幾且得代南還嚴夙抱嵇
生之癖年來感公知遇未即掛冠行且謀引去後晤
未卜臨期黯然嚴最樸樾不嫻聲律勉綴數言亦中

情之不容自禁耳異時展卷或堪捧腹也

往歲晉國逢陽九
蘊隆蟲蟲戍連圄
踴鵠烏昧何處尋
壑轉老羸壯者走
往後惠文此時虛
萑苻潢池嘯聚有
彈壓咸思暴勝之
繡衣持斧頻回首
有命一朝畀蘇天
孺文風采已先傳
國人望君如望歲
蚤見河汾春色妍
累疏乞休休未得
幡然受贈繞朝鞭
西來馬首澄清始
惠露仁風溥大千
亂民亂繩理不急
賣劍買牛旋自戢
去甚亡何害馬驅
勞來未久蜚鴻集
得情惟念子遺餘

獄每為纍囚泣一意平反挽太和雨暘時若蒸民粒
鼠牙雀角牽姦大書嚴禁示轉移頭會繭絲清解綬
根株薤本拔褰帷撤除騶從乘傳日大簡車徒閱塞時
數年官事浹旬了到處登臨有所思風味眉山自瀟灑
情瀾性海何如者文章三昧屬家傳遊戲霜毫總大雅
恠底風霾撼并州離思歛忽嘶驄馬浮雲聚散公不驚
滿腔溫厚憑詩寫天王原不負直臣身繡如故金紫新
熱鬧場中誰是主繁華夢裏未為真讀公新詩見公意

片語咽喉每逡巡只今典刑將漸遠臨歧那不淚沾巾
壽金陵沈年伯母

君不見沈氏母半世心如熊膽苦良人蚤背二孤穉課
讀燈前數夜鼓鳳毛五色一朝成九萬飛如大鵬怒銜
來閣下紫泥書婉轉雙龍護天語旁人羨母母反悲曲
房掩袂淚如絲夫君墓樹堪作柱那得見兒身貴時

南中二老圖詩

有序

四友圖成題咏不乏會華翁總留憲而何翁亦轉留

刑復寄余二老圖序二老周旋秣陵協恭昕夕不啻
周室之有共和惟余孑然輦下二老遠書惠寄倘亦
招徠襟帶之意乎因念聚散偶然晤言難再惟友生
之差可樂舍吾黨而誰與歸亦稱四亦稱二睢陽會
屈指五人或在北或在南耆英堂心聯一席且也年
齊絳縣術羨龍城文昌並列於中台礎柱分肩鴻鉅
壘麓相期於不老恩波共迓昇平五閱歲而穆然思
會計當乎羞為四卿之一再披圖而輟然笑鬚眉宛

爾可容二老為三所悵南北既岐升沈漸異茫茫萍
水雁行已悵離羣涓涓溜流麟閣敢希並駕人於同
年亦有情乎聞其語矣今雖千里不殊面也庶幾遇
之迷香山雅慕醉吟先生追徂社彷彿資聖故事聊
攄短引敬質名壇

南極老人星不孤輕風灑灑披佳圖青城何來紫烟氣
羨門園客無時無我亦頽焉自放思蓬壺年來鹿鹿造
物驅拮据職業形神枯閒牕展對快頌膚鬚眉欲語欣

吾徒一掌留禁釋不辜一總陪憲飭廉隅載讀高談稷
下與吳歛滴滴灌頂甘醍醐劉可役屈宋奴酒後耳
熱歌烏烏翩躚曳履鍾山趨不讓當年九老在東都道
能隨物化身肯要人扶僕本淄黌一耄夫蒲姿亦與名
賢俱五載艱辛東野御居然溫吹齊之竽夜行秉燭胡
為乎菊荒三徑真為愚吐哉二老皆通儒壽身壽國道
味腴君不見覲齒重生鬢欲角增籌賜卣良非迂

式穀歌

自昔中原歌有菽教誨爾子期式穀元亮雖有五男兒
銜盃委運擬慟哭余初鞠子苦艱辛年近半百始誕育
壯兒孱弱且多疾愛養嬌癡徒碌碌目今年垂十九齡
胷次茫然真撲檓有兒生晚又八襁宦邸嬉戲相追逐
詩書誦時轉眼忘督責纔加便頓感孚兒襁褓尚未離
賢愚優劣應難卜吾今罪廢且衰遲一聲長嘯入幽谷
箕裘紹述賴爾曹安得文行常郁郁立身孝友植本根
當效汝父與伯叔任子官薄不足為跼蹐轅下空匍匐

人生不學止濫竽何異冠裳被禽犢式穀回首成絕響
陶詩歔歔不堪讀爾曹從此須努力荏苒光陰如轉轂
勿甘暴棄墮塵埃人為刀俎已魚肉

請室課子歌

溜黌老叟鮮機心四十二載點朝簪中外南北頻拮据
度支承乏惕影衾六年持籌嗟仰屋華髮種種類臨深
匪朝匪夕躬盡瘁畏首畏尾力難任黔驢技窮駑馬殫
倦鳥回首思高林屢疏乞骸琬未賜一言忤旨獄吏侵

隻身狼狽困縲絏十齡稚子相追尋俯仰天地等逆旅
依依將雛祛煩襟憶昔夏侯與黃霸異姓授書傳古今
況爾年少方趨庭好惜寸陰如寸金君子患難行素位
經史喬梓足哦吟天王神聖公論皎濁醕逡巡對月斟

戊寅夏日題泌水園

曩辭藩臬守衡門卜築先開泌水園名韁牽人苦不解
荏苒念載托空言羲爰倏踰親魚鳥此地初構亭與沼
亭對青山繞翠微沼涵碧水通深窈乘風坐月景偏奇

柳色蓮香競陸離
有時獨步或揖客
一觴一詠足棲遲
更憶孔門各言志
惟有點也契聖意
茲園可浴亦可風
依稀似得狂客致
老態龍鍾厭世紛
何殊野鶴與閒雲
科頭跣足聊自適
門外陰晴付罔聞

臘夜侍家大人與陳明軒陳荆泉待月清暉亭
臘夜邀明月
銜盃祛暮寒
高譚霏玉屑
勝友倚芝蘭
生意涵枯幹
驚飛見羽翰
漏更何必問
徒倚遍雕欄

六弟有美才
恐其荒於嬉
也漫賦相勗

彥士吾宗少才名遜爾先勝情酣一石雄藻灑千篇幽
谷須騰翼青雲蚤著鞭無為抱楚璞淪落怨流年

河東請告歸次黎城阻雨

孤城霑宿雨旅客困征蹄冀北音難至齊東望轉迷金
風入夜肅蛩韻趁人低留滯中山道式微弔古黎

遊范公泉

春日探竒勝晴巖入望來翠屏千丈列石竇一泓開促
坐爭長技分曹命巨杯山靈應自喜桃李映莓苔

遊青雲寺

翠律深山裏青雲倚紫霞如來禪土淨釋子梵音嘉缺
月孤峯影堆金滿岸花平臺當落照轉覺興無涯

清明邀諸兄弟過南村因至橋畔流觴

墳麓集令節信步過橋頭澗水潺湲瀉杯醪次第浮媚
人花欲語喚友鳥相求行樂顏乘興悠悠看水流

小疏條陳餉務有感

淪沒封疆痛凋殘戰士悲出車塵廟畧空杼罄民脂纖

喬寧甘諫勲名敢冀垂何年烽燧息衡泌任棲遲

戴罪蒙恩張華東年兄贈詩答和二首

風波嘗注目慙性奈余何持議逢時少抗章忤旨多金
雞欣在宥巢燕喜仍過高義戢良友殷勤白雪歌

持籌嗟太拙賈禍竟如何臣罪丘山重君恩浩蕩多罷

牛丹陛念

明旨云念其
哀病日甚

蹇衛故園過食力惟耕鑿妻孥

共嘯歌

壽高柳溪封翁八十

齊魯歸先進粉榆誦得全靈根元不染粹質自逾妍植
操松筠厲推誠金石堅更饒俠氣古臚有素風偏博雅
同高允冲和類倜儻清時輕拾紫華髮重思玄喜約尋
真侶閒移載酒船臨淄五畝宅傷柳一溪烟經術趨庭
授文章染翰傳恩綸來舜殿袞袞戴堯天八袞逢初度
三朋啟壽筵花魁紛艷發月色倍規圓奏曲咸翹頸稱
觴共比肩濟南充道路薊北溢郊躋玉笋搖瓊液雕輪
控錦韉婆娑驚皓首矍鑠羨長年今子鸛雛美中朝驄

馬賢諫書開睿思
簪筆肅官聯澤洽
千山潤風行萬國
宣秩加卿貳上勳
在鎖闥前況有芝
蘭長而兼雨露鮮
醉歌聲緬緲戲舞
彩踰躔願保喬松
莫常看滄海滄遙
瞻園綺伴時寄九
如篇

初夏讌集張華東年兄黃山會景園

副嶽臨玄圃高梧
隱絳房幾拳凝翠
靄一勺聚滄浪恰
遇清和日欣逢正
覺場靈椿推總憲
丹桂羨諸郎譜牒
招曾偶姻聯萃繡
裳陽丘三璧玉桓
邑兩琳瑯邂逅及

參佐丰標俱激昂嗟余慚朽質亦幸齒班行野曠容疎
放時暄蔭晚涼雄風多岸幘霽月在雕梁歌轉雪兔艷
屏開雲母光呼盧情愈浹下榻興彌長高論窺今古清
言灑肺腸凌晨瞻法座孤峭禮空王兔杵峯巒秀仙蹤
石印彰青精煮作飯松蘿啖生香金谷堪同詠蘭亭可
媿芳驅車薄暮去寤寐忍相忘

濮州張侍御在嘉靖中彈劾不避權貴廷杖足
跛後晉符卿致仕歿數十年而子滄西登第

具冊索詩因贈

栢府森森五夜寒當年直氣震長安雄心欲掃豺狼道
壯髮時衝獬豸冠頻死不言臣節苦餘生惟戴主恩寬
悲今予古情何極遺草令人掩淚看

清明偕諸兄弟拉友遊青雲寺

四圍率律插蒼穹路入青雲一綫通石隙泉流起漱玉
松盤澗曲漫吟風驕嘶金絡驚羣犇飛瀑雷轟震梵宮
遊興正賒山色暝歸鞭遙盼月朦朧

六弟寅新構醉吟亭

曲檻疎籬結草亭，醉吟相伴晝還冥。
烟籠曉樹供詩料，露浥春風映酒馨。
七字喜從酩酊得，百瓢偏為浩歌醒。
竹林高況今何似，愛女新書座右銘。

八弟肅西園芍藥

春花片片蚤飛颺，國色獨留殿衆芳。
紅麗丹砂爭炫彩，白逾瓊玉暗生香。
喜隨豪士開芳讌，懶逐佳人上艷粧。
把酒相看無限意，好收風味付奚囊。

贈曹逸人長庚

蚤謝青袍淦紫霞春風到處即為家
經翻貝葉禪心寂鼎煮黃芽仙氣賒
百斗陶陶天作幕千言纒纒筆生花
情深把臂憐同調慙負瓊瑤報木瓜

丁未清明後一日偕潘茂昆郡伯登嶧山

靈氣遙分泰嶽來籃輿登眺信奇哉
千尋峭壁撐雲出萬壑天桃映日開
仙洞脩脩常欲雨古碑矗矗半封苔
相攜賴有安仁在選勝題詩共舉杯

壬子晉聞中秋陪蘇雲浦直指明遠樓玩月

碧海高飛白玉盤
危樓永夜許同看
譚分貝葉塵心淨
人在冰壺慧眼看
千頃玻璃浮桂影
一杯沆瀣傲霜寒
殷勤為祝多才出
却有奎光照畫欄

贈別蘇直指

烏嶺蒼茫滯遠林
使君驄馬曉駸駸
披衷浹歲堪回首
極目窮途迥繫心
楚岫雲飛迎藻思
江干潮落祛煩襟
清時未許潛威鳳
終向楓宸獻六箴

河東請告

憶從春日東歸裝
梧葉驚飄逗晚涼
塵世已知多缺陷
微生轉覺更蒼黃
寸心一夜飛千里
削牘終朝奏八行
何用名韁牽懶吏
夢分蕉鹿笑亡羊

賀許繩齋憲副擢符卿

把袂河東歲月遙
論心千里托飛翰
山惟長白青青見
路自中條隱隱看
翠捧五雲金案篆
花飄雙佩玉瑯玕
聖朝側席期名世
國士還攄一寸丹

王邑侯招同高東溟中丞遊蒼龍峽即事

咫尺仙巖愧未登使君攜我上峻嶒深潭隱見龍鱗躍
古洞磴礧鬼斧剏酒煩襟渾欲脫倚欄塵慮若為澄
浮名已斷人間鎖從此山陰興可乘

西固道中

對峙雙峯雲際巍洪波滾滾日邊回橋無根蒂仙為造
閣在虛懸佛自來

有魯班橋觀音閣俱懸崖棧道

日暮雲烟迷岫靄夜

深風雨落江埃幾番叱馭勤王事轍跡逡巡遍草萊

階州道中

境入階州勢轉雄高山流水祛心蓬迎風稻穉鱗鱗翠

映日椒馨曄曄紅

階近蜀多稻椒

萬像仙靈垂幻跡朝陽禪脫

證真空

萬像朝陽二洞名萬像深邃奇詭備諸形態朝陽有化禪師肉身近二百年不朽

岷江

一派流初遠裴葛迭思迥不同

岷江入階為白水江約四百里寒燠頓異

壬戌長至後值萬壽節時齊蜀同月獻俘

何幸功成奏紫微廟廊從此慰宵衣侍臣鵠立閒綿蕞
宿將龍驤擁飲飛況際呼嵩紛輯瑞更逢吹律啟陽暉

鴈行拜舞歡聲沸側耳鏡歌傍彩旂

癸亥夏五禱海祈風有應郭贊司以詩投贈倚

和

銜尾餘艖出淼茫酸心玄菟舊封疆征徒欲飽千倉粟
息颶還資一瓣香轉盼鯨波皆順軌須臾鷁首競張檣
聖明自是如天福海若而今亦肅將

送李懋明中丞擢少司馬兼歸省親二律

畿南建節羨中丞入典樞機駿譽騰瀚海烽烟看盡息

潢池氛祲見宵澄，位居北斗司喉舌。官自西臺任股肱，
糠粃更兼砂礫質。憐余疎拙巧相承。

海上寒雲護帥旌，滹沱冰合馬嘶鳴。燕山未擁趨朝節，
蘭渚先分曳履聲。落日片帆彭蠡澤，倚天長劍豫章城。
懸知到日春偏麗，何限萊階娛彩情。

丙寅春祝東寧伯焦太夫人

六珈屢下淨光天，翠節瓊章鶴背鮮。舞袖生雲多異色，
宮袍掛月不知年。絳趺欲照軒轅鼎，青鳥爭看太乙蓮。

別有仙家金鏤管歌成燕喜倩人傳

留計移疾東歸途次咏懷

蒿目風塵賦倦遊恩深賜玦拜宸旒人生若夢老方悟

世事如麻病亦休華髮羞為丹轂戀曠懷好共赤松謀

堂開姦節書千卷

擬用明旨
建一草堂

枕漱閒閒伴海鷗

丁卯三月望前一日邀于鴈先登冲山分賦

嘉客遙臨暫啟關相將別墅眺春山溪流似鑑宜供漱

村酒如澠解駐顏靄靄峯巒形倏幻鱗鱗墟落望中斑

不緣衰足妨遊興
藉草盤旋薄暮還

四月朔石隱園小酌用鳳先韻

夏屆春歸花尚紅
披襟更喜故人同
烟霞秀色山堪飽
松竹濃陰圃可宮
盤薦畦蔬無異味
堂開甕牖有薰風
棲遲自笑真疎放
慙負清時奏最功

送孫龍拂太史還朝

榴紅行色映恢台
折柳繽紛蔭水隈
夙羨擲金孫綽賦
今看前席賈生才
蓬池日近頻頒鱸
鰲禁雲深半覆槐

次第絲綸勞啟沃三篇說命補天裁

題清朝四友圖

追隨贏得步趨寬千里修途百尺竿曳杖應隨野老後
彈冠猶續少年歡漫言歲月驚非故却羨鬚眉未改觀
一幅丹青傳妙手松筠遙映在雲端

送冢宰閔曾泉予告馳驛旋里二首

封章十上乞閒身天語春溫動路人樂聖堪傾烏氏釀
投簪欲飽太湖蓴青門競羨新疏傳紫閣仍傳舊統均

多少人倫思玉尺東山寧久卧璘珣

風月平分入錦堂
宵雲老樹鬱蒼蒼
杖藜數點孤峯曉
蠟屐一生幾兩忙
龍隱具區猶帶雨
葵懸魏闕故傾陽
相看賸有烟霞骨
寤寐淄蠻未可忘

送大司空曹葆素予告馳驛還里二首

桃花潭水恨分襟
宦海誰能不陸沈
老我秋風徒憶鱸
多君逸興蚤抽簪
玄圭正聽星辰履
白社俄分烟月心
萬古青齊青未了
幾時把臂共探尋

深入白雲莫算程臨風相送幾馳情山舍遠意遲輕屐
水約迴波問舊盟春醉人推新社宰道裝誰識故冬卿
只今聖主方宵旰縱卜東山卧未成

送南大司寇沈何山年兄予告歸里

秋葉如蓬清露盤遙聞蓴鱸倍加餐東山宜為蒼生卧
北斗長懸法曜丹竹馬有緣白髮舊西湖無恙海鷗寬
看君儀羽雲霄上媿我陳情墨已殘

送孫瞻園兵憲還秦

西風拂拂起燕塵一策垂楊影外身
茹蘗芳名猶在薊
凌霜客夢已先秦當年籌國慚分席
此日臨歧倍慘神
聞道嶠函烽火息但逢征雁即懷人

送江岱宗民部歸新安

相看一策出都門此際離情未可論
似我衰顏應草野
如君英茂亦丘樊
故人意慘秋雲澹
逐客神懷夜月昏
白嶽黃山高卧處須知盛世有餘恩

輓南銓正郎王文水

北地風高旅雁哀故鄉千里訃音來百年文武協三德
念載行箴付一坏魏闕羈臣殘骨在天涯姻友夢魂迴
悵余憑弔知何日極目鄉關漫自猜

乙亥正月祝張華東年兄七袞

亞相勲名斗極懸功成身退領雲烟古來龍馬神元王
世外鸞驂興自便徑轉月蘿青嶂曉樽浮露桂紫霞鮮
仙人白兔前身是甲子何須數絳年

和張華東年兄溜城夜飲

榻下茆齋驄馭巡烹蔬設醴意殊真
韶年共躡雲霄路
晚歲相將丘壑身
膠漆情殷濃似澹堦
麓誼重久如新
向平未了何須問
躡屐登臨覓友人

丙子初度感懷

蓬弧六十八回春
潦倒頽齡媿此身
學圃祇期松菊茂
傳家豈慮子孫貧
喜聞翔騎初奔北
愁聽長鯨未息塵
但願太平調玉燭
烟霞高卧慶芳辰

偕楊張兩年兄登岱

排雲直上叩天閭
石磴嵯峨杖履存
漢時樂經藏玉簡
秦松曾此駐金根
俯窺徧矚獲麟野
遠眺空超繫馬門
夜宿峯頭寒徹骨
同人虛約探朝暾

韓中丞仙洲圖

開府歸與樂事賒
名園飛閣枕澧涯
橋通芳沼橫朱檻
泉激迴湍瀼雪花
縹緲峯頭鸞鼓翼
嶼石竇笋抽芽
扁舟晚釣一輪月
曲洞晴分萬縷霞
甚局共彈松影靜
金尊長趁竹陰斜
溪翁雨過呈芝菌
仙子雲臨寄棗瓜

三島超從塵世覓十洲堪向箇中誇已知在澗吟梁父
更取臨流礪莫邪絕塞烽烟猶未息窮簷權採正含嗟
謝公夙繫蒼生望寧許東山戀物華

題四友圖用香山體

長安為覓壬辰譜紉佩相看幾故人共荷清時聯八座
每逢雅集拚兼旬低徊素髮三千丈頡頏青霄四十春
松栢歲寒終不改波瀾世事莫重陳詩緣興會旋成韻
酒對心期詎問巡醉後披圖從指點商山吾欲卜芳鄰

惜庭花

提甕汲新水
堦前著意澆
好花初爛漫
底事苦飄飄

屈指歸來日效白體七首

屈指歸來日
中秋桂影圓
賞心無箇事
棠棣倍相憐

屈指歸來日
東籬花正開
寒香三四種
斗室共徘徊

屈指歸來日
懸弧逼賤辰
蓼莪空灑淚
茆茨却無春

屈指歸來日
依然韋素看
杜門甘養晦
當路恥相干

屈指歸來日
清貧守故常
緼袍體自暖
藜藿味偏長

屈指歸來日荒園滿綠苔猶堪得句放浪可銜盃
屈指歸來日竹桃正著花還應識故主爛漫吐紅霞
擬遊黃華洞以大風不果

咫尺因罡風黃華不可見山靈解妒人藏却本來面

贈曹長庚二首

世情洗盡直如弦耽酒工詩妙悟禪莫道曹丘空四壁
滿囊珠玉總娟娟

蠟屐行吟逸興多墨花飛灑遍山阿道經寫罷無他羨

翻笑羲之欲換鵞

漢壽亭侯墨竹

凌霜心事許誰知
書付蕭蕭竹兩枝
秘意當年渾未解
丹青千載繪新詩

戲東曹長庚問病

為問東村曹長庚
匡床何事負春風
藥爐初沸參苓飲
好瀉纖纖玉手中

壬子初春有感

荏苒春光去不還
朝來白髮鏡中斑
簿書擾擾成何事
返我山中學駐顏

于鳳先天才雋逸久別乍晤感喜交集長至有
詩倚和二首

陽生緹室初驚序
斗燦奎光已映身
三十年前鉛槧友
於今重作論文人

但著千秋不朽業
無勞深羨宰官身
若教科制仍詞賦
君是龍頭第一人

壬戌長至有感時事漫賦二絕用白蘇韻

一灰葭動新吹律五夜香焚舊檢身笑我硜硜還碌碌
圓通常是不如人

泰道將亨尚未回側身天地一孤茆故園松菊今相待
屈指春和歸去來

真如寺春日雜咏二首

籍田曠典萃鷄斑蕭寺孤臣抱膝眠慙骨自嗟還自艾
夢魂空繞御爐烟

家音讀罷暗銷魂
季子疾侵仲議婚
堪歎此身同桎梏
愛緣拋却任乾坤

和張華東年翁齋居祈雨韻

雷電驚心夜不眠
一朝浩蕩九霄傳
初衣已遂無他願
但乞時豐供稅錢

途次和張年翁咏桃花

綠楊春樹蔭芳鄰
中有夭桃別樣新
馬上不煩頻指點
好花應笑白頭人

丁丑夏月和韓邑侯喜雨二絕句

青駿誰駕代天工一夜甘霖萬井同
岐麥共欣霑化雨虞絃還喜奏薰風


夕曛灑潤抵朝陽悔禍天心忽降康
試向翳桑陰裏聽聲聲布穀喚人忙

戊寅正月壽張華東年兄七十三初度兼訂觀
海之約

宦海同遊五十年歸來衰鬢各皤然
於今拋却人間事

共向王喬問大還

傳聞海蜃幻樓臺
仙屋籌添瑞氣開
岱嶽孔林遊屐徧
何當把臂向蓬萊



石隱園藏稿卷一